



隨齋紀程卷五





隨鑾紀程卷五

一等編修官兼攝內閣大書記官從五位川田剛撰

九月二十二日。過上院內。涉雄物澤。卽戊辰戰場。右  
有城址。天正中。小野寺氏驍將真崎五郎居之。為  
部兵所戕。土人呼為五郎館。從此以南。羣山對峙。  
中通一徑。深林蔽溪。日色晦冥。踰四坂。渡五橋。至  
籠澤。仰望院內嶺。大路盤空。蛇蟠蚓屈。蜿蜒九折。  
每折設欄。巖嘴崖角。柵防崩壓。騎者連轡。車者並  
軌。步者比肩。徐行半里。不覺太艱。山形縣令三島



通庸來迎。此地舊秋田藩南境。萬山重疊。石欹木  
竦。世稱天險。中興廢藩。嶺北屬秋田縣。嶺南  
屬山形縣。兩縣協議。聘蘭人相地。測高卑。審曲直。  
鏟削築椽。悉遵其法。三閱炎涼。始告竣功。踰嶺經  
朴木澤。一水北來。曰及位川。小驛枕水。前對峭壁。  
水簾數條。墜於石上。碎為白雨。沈為深潭。下流架  
石梁。長七十餘尺。疊石成礎。啓雙竇。形類鸞鏡。  
余憑欄捫鬚。侍臣傳旨徵詩。輒獻一律。梁南  
坂路逶迤。上御板輿。屬車推輓。陟二十餘町。雲

濛濛然。起自脚底。須臾彌滿山谷。四顧一白。如月  
夜泛海。至絕頂。戊辰官軍與賊鏖戰處。曰鹽根嶺。  
天霽雲開。衆峯簇擁。俯撮其髻。則地位之崇可知  
矣。嶺外林莽。又有前坂森合之險。亦削巖填澗。開  
新道。達金山驛。西有鮭延氏故城。羽源記。天正十  
一年。最上義光攻佐佐木典膳。城中食竭。衝圍而  
走。衆欲追擊。不許。曰。典膳年少有勇。異日收為我  
用。既而招降。復授城地。更姓曰鮭延。稱越前。越前  
感激果立戰功。義光愛才如此。其雄張一方。非偶



然也。涉上臺川。故道嶮岨。亦經開修。踰橫根岡。地形夷曠。二里次新庄驛。以郡署爲行在所。署在驛中央。市街一條。草舍連簷。指野河東流。經署南。合中野河。入鮭河。東有龜割木象諸峯。北連鹽根山脈。西南遠控最上川。田疇平敷。邨落相接。封建時。戶澤氏之所治焉。戶澤氏之先曰治部大輔盛安。驍勇絕倫。初居角鹿城。屬南部氏。後自立拓疆。攻略郡邑。屢與秋田氏小野寺氏戰。威震四隣。呼爲夜叉九郎。關原之役。其子政盛率衆屬東軍。

以功食茲土六萬八千石。戊辰之亂。政盛十一世孫政實。爲賊兵所攻。衆寡不敵。北奔秋田。城址今闕。爲市坊。驛北招魂社。祀戊辰戰死者。是日賜金遺族。充祭粢料。夜縣吏伊藤十郎。松井秀房等來。談最上川舟行之奇。游意勃然。

二十三日。離驛而西。二里餘。則最上川有三源。發於福島。宮城。兩縣界。其自吾妻嶽者。曰羽黑河。自檜原嶺者。曰大樽河。二水相會爲松河。自飯盛山者。曰白河。抵大鷹山南。亦合松河。入邨山郡界。始稱



最上川。逶迤九十餘里。而旭河。寒河。酢河。丹生河。小國河。皆歸焉。蓋兩羽諸川是為最大。本郡名最上。亦此之由。川東古驛。曰本合海。合海又作鮎貝。義經記。謂之合川津。車駕從津口渡浮梁。余與兒玉文學。藤本周三等。欲試水路。召亭長。艤舟。舟長一丈八尺。六分其長。橫居其一。水手二員。一在舳。執篙。一在艫。執柁。順流而下。綠樹蔚蔚。培塿倚岸。曰矢向山。山盡而野。鮭河來會。水成丁字。抵古口津。是日。以矢魚故。傳命。過行舟。及我舟。

至此。上在帷宮中。瞰之。侍臣誰何。乃撤蓬拜辭而過。則角河又自南壑來注。頓增水勢。岸轉磯移。漸入峽中。左觀飛瀑掛崖腹。曰小瀧。其西復有一瀑。折為三層。曰三瀧。然密樹蔽遮。獨見最上層。長十餘丈而已。又西巨巖塞路。鑿開大竇。行旅從竇中過。竇外絕壁陡峭。老樹倒生。其下嵌空有深潭。水虎所宅。俗呼水虎為河童。因稱河童淵。余欲迫視。灘石森立。怒猊磨牙。不可向邇。捩柁沿北岸。便風掛帆。經沓喰磯。一瀑墜自懸崖。一轉眄間。又



見一瀑。看到第三瀑。並不暇問名。瀑去村來。滿山老杉。大皆數圍。樵夫五戶。販薪炭。屋背古祠。曰外川神。又曰仙人權現。相傳常陸坊海存煉修登仙處。神仙有無。余不得而知。但此間古無人跡。有些烟火氣。輒不得往。則謂之仙亦非誣言也。顧瞻南涯。礫磧阻峻。一成而坯。再成而英。三成而陟。呀為洞穴。斷為谿澗。雲棧掛焉。飛橋架焉。呼為仙坂。真仙境也哉。時山雨欲來。雲烟吞吐。舟走境移。氣象萬變。忽見白虹一道直下飲溪。卽白絲瀑也。瀑西

峽。巖巖聳。奔瀨雷吼。谷風所激。盤渦回旋。遇一船載重。泝流。挽夫魚貫。手執百丈。尻高於頭。寸前尺却。不離故處。而我舟與此相反。一葉掀舞。疾如飛鳥。瞬息出峽。岸遠水平。豁然別開一境。鳥海山拔地。六千尺。現孱顏於舟首。文學與周三叩舷呼快者三。初余乞假半日。欲探奇峽中。迎躡於清川驛。因問舟子以驛所在。曰過去旣隔半里強矣。則勢不可返棹。乃乘流二里。維纜北涯。晚甚雨。就館酒田港。酒田或作沙瀉。埔頭舊在南涯。朔風吹



沙。海潮浸溢。天文中徙今地。人口二萬。衙衙縱橫。西臨溟渤。東接曠野。數郡運輸所由。貿易尤熾。東有故城。天正中。東禪寺某居焉。後為本莊氏所據。尋屬最上氏。及酒井氏領。效土。遣兵屯戍。

中興撤城。士族聚居。尚三百戶。瀕海漁邨。自女鹿浦。經籠山。接秋田縣界。巖石峭立。險惡無比。近年鏟鑿通車馬。稱三崎新道云。

二十四日晴。早發涉最上川。川北飽海郡。屬羽後州。南則羽前田川郡。古稱出羽郡。屬越後。和銅中。割

越奧地。別建一州。開府本郡井口。升為州名。事見舊史。但改郡名。年代未詳。過新堀驛。落合川北注。野航數十隻。載米苞。南有橫山驛。清流縈回。曰赤川。兩涯相距百二十間。中坻累石成基。接以二橋。呼為娥眉橋。過文下道形二村。抵鶴岡。車馬填溢。迎幸者。絡繹如歸市。此地舊曰大泉莊。文治中。源右將以武藤資賴為莊司。子孫世襲。其所居稱大寶寺城。又大梵字城。天正以還。最上氏。上杉氏。更據之。元和八年。幕府封酒井忠勝。食田川飽



海兩郡十四萬餘石。土沃穀饒。加以漁鹽。戶口繁殖。號為富強。

王政維新。忠勝十一世孫忠德。有罪削地。改稱大泉藩。已而藩廢。隸酒田縣。尋徙治於此。稱鶴岡縣。今為山形縣所轄。設郡署及警察。電信。郵便諸局。撤城壘為公園。士民建祠。祀忠勝父祖三世。曰莊內神社。是日。車駕至自清

川驛。以郡署充

行宮。洋式石造。廣百八十坪。

其樓三層。下分數局。曰事務所。曰應接所。曰受付所。曰宿直所。曰戶長詰所。曰小使詰所。曰人民扣

所。曰湯吞所。午刻召見舊藩主忠篤兄弟。畢。

幸公園。士族相集。演刀法。試騎乘。賚以金幣。又

臨朝賜校。三島縣令上教。則校規。及教員生徒名

簿。賀箋。次

巡覽教場。幼童數百。排立於庭。習

所謂體操者。一舉手。一投足。悉應號令。齊整可觀。

樓上列案。生徒講經史。化學生試其術。別設博物

場。陳寶器古筆。及管內產物。未刻。還

駕行宮。

觀莊內神社祭儀。試記其大畧。摔手。檠戟。皆雙行。

繼以長槍若干本。次臂鷹者若干員。次韋銃若干



口。次幟弓若干張。次金輿三座。舁夫著烏帽白衣。左右簇擁。次甲冑三櫃。泥金描紋。次誕馬三匹。其一轡韁皆緋。彪韉覆鞍。其二錦韉。轡韁雜用青紫。其後衛有騎者。有徒者。皆服縛袴燕尾衫。腰佩雌雄刀。蓋封建時。藩侯覲幕府。鹵簿乃然。今至尊行幸。亦不用此華飾。可以見時勢之變矣。本郡志士欲振起古道。鳩資新建神宮教會所。因使二品親王臨視。大隈參議。大木參議。金井大書記官。及余從之。晚謁德大寺宮內卿。辨昨日迎

蹕愆期之故。哂而不咎。還館則屨滿戶外。蓋乞書者來集也。

二十五日。

聖體違和。二品親王代巡松岡社養蠶場。相隨者大木參議。杉宮內大輔。東園侍從。及余。凡若爾人。社者舊藩士之所開。在鶴岡東南二里。離市街左折。浮梁渡赤川。遙瞻連嶧入雲。其峻拔者三。曰羽黑。曰湯殿。曰月山。月山最高。而延喜式所載。伊氏波神社。蓋在羽黑山。近世為浮屠氏所占。曰是觀世音化現。幕府寄祀田千五百石。僧



房三十。修驗者所居。四十餘宇。愚俗崇信。至自遠方。號為靈場。中興收祀田。以伊氏波神社列國幣小社。湯殿山即赤川之所發源焉。沿川而南。桑圃夾路。皆新墾也。社員迎候。短褐草鞋。手執耒耜。入場蠶室。連棟。分為兩區。廣各數十間。向陽啓牖。風氣流通。棚架山箔。盤鍋。繅車。諸器皆備。蠶時之盛可想。憩於別館。構造古樸。詢其所由。則加藤忠廣故第。移自九岡來。忠廣者主計頭。清正嫡子。襲父封食。東肥七十二萬石。獲罪幕府。貶死。茲土。

遺墳在鶴岡本住寺云。社長松平親懷謁親王。獻繭綿。生絲。及地圖。家圖。機械圖。五十六紙。資以五百金。又以土人風間某等。修路造浮梁。亦賜若干金。已刻。回轅詣行在。則啓躡。渡大泉橋。

過大寶寺村。距此二里。有大山村。慶長中。大山筑州所居。市民殷富。多業釀酒。所謂大山酒。遍售於北方。其味亞丹釀。又西一里。為加茂灣。海船雲集。有唐船番所遺址焉。又西七里。為鼠關。義經記。所謂念珠關。羽越二州分界處。隔海有辨天島。怪石。



錯落碧波涵天。號為奇絕。恨途阻並不得造觀也。大寶寺以北。一路坦夷。昨日所經。忠篤兄弟。送到橫山驛。押切新田人加藤保興。造板屋於路傍。陳其所製繭絲綾緞。及駕過焉。榨牛乳。頒給眾員。保興夫妻竭力耕織。闔鄉薰染。左大臣枉顧其宅。面賜褒詞。最上川。雨餘暴漲。不可棹。乃列植長杙。橫張大索三條。達兩涯。以細繩約杙與索。御船解纜。水丁數人在船首。緣索絕流。脚道登岸。觀漁者投網。俄而爆裂一轟。仰見群龍騰空。即士

族迎。幸奏烟火戲也。經大宮村。次酒田港。土人本間某。以素封聞。初省方令下。有司點定館舍。眾意以本間氏擬行宮。隣里有渡邊信義者。亦富民也。嘗建商館於此。其樓輪煥。美矣大矣。高且敞矣。乃又起土木。四邊植柱。長十餘丈。樓上架樓。寬容百餘席。傍造廣棚。敷土數畝。雜栽花卉。不啻飛欄映雲。即空中開園林。人駭為神工。是日駐蹕焉。夜與金井大書記官投館。就賜大鯉二尾。葡萄一籠。信義及新聞社主小野藤右來訪。



二十六日。早起登邱觀海。旭日映射。紅潮拍天。西望遙見青螺。曰飛鳥。周圍二里。灣曲水深。船舶來泊者。歲不下五六百隻。信義建倉廩貯穀焉。元祿中。河村瑞賢掌海運。本州官糧。小舟漕最上川。至袖浦。接載海舶。事見奧羽海運記。邱南卽袖浦。然平沙曠漠。無禦防風濤。彼唯記大畧。若擇破泊地。則飛鳥愈於袖浦數等矣。辰刻。

車駕幸福島裁  
判所支廳。判事鶴峰申敬。上官員名簿訟獄一覽  
表次。臨琢成校。三島縣令先導。教員上賀箋。

生徒講書。試化學。並如例。亭午啓

蹕。自

行宮抵最上川。水勢減於昨。航而涉之。卽新堀驛。左折經余目村。觀農夫刈稻。南北朝時。阿保氏居此。今乘慶寺靈牌。題曰至德丙子霜月十六日。安保太郎吉形。按安阿音通。當時武臣有兩阿保氏。一稱入道道堪。從新田義貞。戰死於分倍河原。一稱肥前守忠實。屬高師直部下。立功於四條河原。太平記。忠實荅人。有吾生長東國。逐獸山野。捕魚江河之語。以地勢年代考之。吉形蓋忠實之子弟。



也。村東二里曰狩川驛。慶長中。最上氏部下曰北館大學者。引立谷水。溉田鑿渠五里。所在設閘。洩蓄隨宜。衆民至今利賴。呼爲大學堰。又東一里。次清川驛。以學校爲行在。土人設場張猿樂。曰此家世傳受。與今觀世寶生金春金剛四部所演不同。余不解音。無以辨得失。然禮亡求之於野。安知其非古調乎。往時本驛人有清川八郎者。西遊在江戶。殺人亡命。潛游鎮西。時海內多故。謀募死士舉事。幕府逮捕。赦入新徵隊。八郎粗涉書史。學

劍於千葉周作。嘗與其友渥美五郎過余論事。余誠以浮躁。果皆不令終。今而思之。彼亦奇男子矣。是日。信義獻駿馬。賚以緞子二疋。

二十七日。啟。蹕。渡東雲橋。其水發自月山。北流十四里。曰立谷河。河外腹卷山有懸瀑。稱界瀧。卽田川最上兩郡分界處。戊辰之亂。鶴岡軍據御殿林。王師涉河進擊。不利。蓋是時同盟抗

命者二十餘藩。大抵觀望勝敗。獨鶴岡出兵侵畧隣境。設令仙米歸順。遲在數旬後。則兩羽二十郡



為賊有。亦未可測。危矣哉。拜草薙神祠。祠東洞穴。靈泉出焉。居民數戶。待客為活。曰土湯鄉。左沿最上川。隔水望白絲瀑。時急雨一過。水勢頓加。與往日所觀稍異其趣。此距古口二里。封建時。新庄藩西境。塞險扼要。行旅來往。唯由舟楫。而巉巖欽崦。風雪霖潦。動輒致阻絕。三島縣令審察地勢。刊木鏟石。闢路南涯。昔日猿猱之所不能攀。今通車騎。名曰磐根新道。建碑記興工巔末。其文屬官肝付兼武所撰。三條相國篆額。日下部內閣大書記官

書之。自入峽路。右傍削壁。左臨激湍。巖皆斧劈。樹皆鹿角。澗架畫橋。石鑿竇道。車行二里。渡角川橋。抵古口驛。此間奇絕。往日自舟中望之。擬以一幅南州畫本。今身在畫本中。始知一皴一點。一淡一濃。造化兒不苟下筆也。涉最上川。次新庄驛。舊藩士九十餘人。鬪刀槍拳法。閱奇險來。又得壯觀。殊覺結末大振。縣令請余作猿羽根新道碑文。約明日遣屬吏嚮導焉。

二十八日早起與縣吏伊藤十郎松井秀房偕涉新



田河登榨坂。路傍廣圃。土人細梅某所墾闢。草花  
浥露。蟲語報秋。小國河發自黑森山。合衆溪。逕坂  
南入。最上川。板橋長四百六十尺。製倣雲梯。欄桁  
梁榱。牝牡交互。束以鐵釘。層累架空。跨兩涯。中流  
植柱。特承重焉而已。則暴漲失柱。橋體依然。尤爲  
奇巧。橋外荒壘。戊辰官軍與賊鏖戰處。過舟形驛。  
溪流淙淙。一路蜿蜒。從山脚登土。赭樹稀。絕頂有  
地藏堂。最上邨山兩郡所分。東南望淺見川。田諸  
峰。而月山葉山與稻倉山橫亘西北。一水逶迤繞

其麓。卽最上川也。堂南下坂。則名木澤。自舟形至  
此。一里十五町。呼爲猿羽根新道。據十郎等言。此  
地四周崇嶺。三冬沍寒。大雪堆積。不辨谿谷。春夏  
氣暖。雪融土崩。而行路險艱。捫蘿緣巖。動輒爲壞  
雪所壓死。於是削高填卑。緩急隨勢。開道山腹。以  
便行旅。蓋鳩工五閱月而成。其費金一萬六千五  
百圓。辨以士民義捐。毫不仰官。給云。上野原枕最  
上川。風致可愛。土人打魚供御覽。供從官以  
紅餅。南行二里。踰坂抵荻袋邨。地舊榛蕪。闢爲田



畝栽桑麻。有勸業試驗場。別設小次植古木。化石者二株。大各二人圍。枝葉脫落。根幹依然見。條理曰。里人築堤丹生河上流。掘土獲之。長一丈三尺。折為兩段。蓋數千年外物矣。是日執耒耜墾荒者數百人。牛犢成羣。物慘犒。其耳濕濕。初土俗不解牧牛。生田邨民平山慶二養洋牛三百頭。歲致蕃息。今所見是也。渡丹生河。越眺望坂。尚食於尾花澤驛柴崎氏。庭建柳。本人麻呂歌碑。崇二尺八寸。廣一尺二寸。強。背署長曆二年戊寅藤原

實方。問其故。曰。前四十年闢荒。獲之土中。然實方為陸奧守。長德四年卒於任地。見尊卑分脈。及中古歌仙傳。則長曆戊寅後。於卒年四十載。後人託古。每見破綻。豈獨古文尚書孔傳而已乎。此地。在丹生隴氣兩河之間。舟楫通最上川。居民四百餘戶。余隨左大臣巡視學校。大隈參議巡視玉野原墾田。玉野距此三里。在銀山嶺下。續日本紀。天平八年。將軍東人從賀美郡。至出羽國最上郡玉野。蓋古者置賜以北。總稱最上郡。仁和二年。割為二



郡南稱邨山。今又分邨山為東西南北四郡。此在其北部。所謂玉野。即玉野原也。又三里踰四坂。皆開新路。涉四水。皆西流入最上川。田野平曠。左望甌嶽。右瞻葉山。迫隰次楯岡驛。天正中最上氏驍將楯岡甲斐所居。戶口倍於尾花澤。左大臣巡視學校。余與川邨正平從焉。夜雨。乞書者羣至。郊外奏烟火戲。光達行宮。

二十九日晨雨。

車駕幸溜井。蓋此地高燥。數旬不雨。田疇龜坼。有富民喜早伊右者。鑿大池於驛

東。畜水以供灌溉。名曰溜井。三面循山。一方築堤。百四十間。其費金一萬三千圓。一身擔辮。不仰官帑。又造亭池畔。南臨平野。溝渠所通。秋稼如雲。皇上倚欄聘目。殊有喜色。辰刻回轅。過宮崎邨。觀農婦刈稻。從此而南。松林夾路。茅檐槿籬。民家斷續。雨歇雲霽。水晶山微露翠鬢。一水來自山腰。沙礫所支。歧分兩派。架二橋。短者四十尺。長者二百六十尺。皆稱萬代橋。是水平時乾涸。春夏雪融。暴漲敗堤。害被遠邇。呼為亂川。抵天童驛。士人



設場演刀法。驛西故城。文政中織田信美所築。戊辰之役。其子信學屬先鋒。為賊兵所敗。一藩危懼。欲與連和。獨吉田守隆固執不可。遂賦絕命詩。自刃而死。烈矣哉。舞鶴山以形似名。延文中斯波賴直城於此。子孫傳業。為最上氏所滅。山下愛宕祠。最上氏所崇祀。幕府付祀田千三百七十石。今收其田。仍列縣社。山上有建勳神祠。信學祀其太祖。右大臣信長。倚設招魂社。祀守隆及死事者十三人。離驛里許。涉立谷川。聞上流有立石寺。堂宇宏

壯。風景奇絕。欲造觀。以途阻且長不果。漆山驛豪農半澤某。家世好學。富聚藏。嘗借覽其曳尾堂書目。五車二酉。間有吾輩未寓目者。及車駕憩其家。牙籤堆案。匾額屏障。皆元明人筆蹟。余欲諦視。則衆官滿堂。坐無餘席。俄而報啟。驛倉皇出門。意殊茫然。過七浦邨。渡千歲橋。則山形縣治。老幼攜扶。防火夫排立夾道。吏員學生。正服郊迎。駐蹕於博物館。此當陸羽之孔道。負崇山。面曠野。南帶酢河。北引馬見崎河。人烟聚簇。官署學



校神祠佛宇。鱗次交錯。分爲三十六街。延文中。足利氏族斯波兼賴城於此。稱最上氏。傳業十四世。至義光。兵馬強盛。威震四隣。元和中。幕府徙其子義俊封。以鳥居氏代之。其後松平奧平堀田水野諸氏更來受封。中興廢藩。置本縣。尋併鶴岡。置賜兩縣。人口六十七萬餘。田租金八十四萬四千二百餘圓。初封建時。列侯有罪。左遷封此。世斥爲惡地。今知其不然。昔人云。百聞不若一見。信哉。晚投館舍。就賜葡萄一籠。縣吏郡長教員學生來

訪者相踵。是日。勅二品親王代巡西邨山郡。大木參議北條侍從等從焉。自天童驛右涉最上川。歷新田仁田楯西楯南諸邨。還具奏其狀。

三十日朝雨。車駕臨縣廳。廳在市街中。前六年所建。洋式石造。大樓三層。簷牙翼然。庭植花木。繚以石屏。四門洞開。南面設階。初起徒。三島縣令先修鎮火祭。躬與僚屬執耒耜。荷輦鋪部民勸感。壯者助力。富者獻財。不出半歲。工事告竣。是日上御第一層樓。聞縣令奏爲政始末。畢。巡覽諸局。



僚員拜送門外次

臨師範校教員生徒皆獻

賀箋講經史次

臨博物館以本館充

行宮假用郡署代之陳土產物貨及古器書畫次

臨福島裁判所支廳判事一賀通文上訟獄一覽

表次

臨授產所觀紅女製絲織帛次

臨千歲園一閣倚邱清流四周東對千歲山積翠

蔚蔚有所謂阿古屋松者相傳歌仙藤原實方為

陸奧國司欲觀此松踰境來游半途病死其女哀

悼歸佛瘞遺骨於此為建石碑今萬松寺即是也

余望山誦古歌侍臣傳

旨徵詩輒賦一律上

之園寬五萬八千餘坪引馬見崎河為溝渠埋鐵

管於土中噴水灌之栽桑茶蘆粟及穀蔬菜瓜皆

內外良種以試其適土宜與否名曰勸業試驗場

場外有廠設織器繅器紡器彈棉器掛絲器皆運

以水力名曰水力器械場申刻回 蹕行宮余

與大隈參議大木參議伊東侍醫等隨左大臣巡

視濟生館亦石造也門庭寬宏有事務所有應接

所有診察所醫房藥房養病房位置秩然設螺旋



梯登樓。上層揭三條相國額字。次層置紙造偶人。九竅四支。腑臟筋骨。製極精巧。以資解剖術。樓外露臺尤宜。聘觀山河形勢。瞭如指掌。是夕召見本館教師。與國人漏列氏及福島縣令山吉盛典。新瀉縣令永山盛輝於行宮。畫師菅原白龍獻粟子山道圖十二紙。

十月一日晴。發縣治。過南館邨。南有長谷堂城址。史稱慶長五年。上杉氏將直江兼續大舉侵山形。取二十二塞。進攻長谷堂城。卽此矣。涉三水。酢河較

大架石橋。長百九十二尺。崇十五尺。疊石成基。鑿三竇。狀如連環。水注自環中。霖雨暴漲。確不毀損。呼為常磐橋。戊寅三月起工。九月告竣。役徒七萬人。其費一萬五千圓。出於士庶義捐。事具肝付兼武所撰碑文。橋北構亭。飛欄枕水。皇上與侍

臣指點形勢。其連峰聳雲表者。為龍山。為熊野嶽。為刈田嶽。皆此河之所發源焉。河南一里登早坂。開新路。以迂為直。左右廣圃。約三萬坪。栽杉樟檉槐扁柏花柏山胡桃公孫樹金松杜松落葉松七



葉松羅漢松。皆釋樹。抽土不盈尺。蓋本土氣寒。樹木難長。加以樵蕪無禁。山皆童矣。今養樹苗。欲待其長。分移諸郡。豈所謂十年之計。種樹者非邪。有司奏開圃巔末。乃命曰養苗園。使杉宮內大輔作額字。已刻尚食於上山驛。居民八百戶。封建時。松平信庸食茲土三萬石。今撤城郭。開市街。曰鶴脰町。有溫泉出焉。逆旅引泉待客。四方來浴者。歲不下萬餘人。云。初信庸少襲父封。有金子清邦者。為其所任用。講文武。振士氣。革諸弊法。慶應丙寅歲。

旱民飢。有司欲發倉廩救之。清邦曰。民不可使坐食。乃起徒浚治城西忠川。築堤防。開溝渠。貧民執役。輒給米錢。所全活甚衆。而數邨田畝。至今賴其水利。清邦一名謙。字鳴啣。號得所。嘗游江戶。交四方俊傑。屢與余相往來。先是木戶顧問年少稱桂小五郎。學劍法於齋藤某。為塾頭。儕輩忌能。欲加害。清邦居間和解。後語余曰。小五郎決非一人敵。異日必能成大事。噫。風塵識宰相。清邦亦人傑也哉。過午。啓。蹕。余隨大隈參議。巡覽見目原牧。



野原墾田追及

車駕於中山驛涉四水踰一

坂南有白龍湖產蓴菜魚鰕土人鑿渠引水資灌  
漑故道循湖蓴菴卑濕由新路歷宮內邨抵赤湯  
驛亦有溫泉居民二百五十戶多待病客爲活驛  
外歧路右通米澤乃左轅歷柵塚深沼竹森根岸  
四邨涉屋代川達高畠驛此間二里大道布沙左  
右設欄五町一棚十町一棧陳幣帛列俎豆男女  
稽顙如對神明及夜以郡署充行宮全驛二  
百六十餘戶植竹竿懸毬燈一竿所懸多者百餘

少亦不下五六十而四郊揚烟火彩星爛燦明如  
白晝蓋本郡土沃物饒昔隸米澤藩有高梨某者  
訴其苛政於幕府族誅而藩主亦坐削封三萬七  
千石織田氏代領之其後織田氏北徙藩封復舊  
民猶不服連署噉訴因刑主謀十七人而訴者與  
不訴者分黨讎視貞泉寺僧諦忍爲上下所歸依  
百方解諭遵藩命旣而中興廢藩大減賦斂  
物情貼然謳歌之載塗良有以也

二日朝

幸屋代校校在驛口臨屋代川樓上陳



土物及寶器古文書。離驛左過鹽森邨。岡阜隆起。巨巖塞路。中鑿一竇。呼為洞門。龜岡邨有大聖寺焉。入山門。左右列石燈籠。拾磴數百級。老杉四圍。古祠巍然。曰文殊堂。堂側銅盤畜水供盥嗽。徑九尺餘。有石碑。漫漶不可讀。蓋此寺。宣化帝時。廐戶皇子創造。大同二年。僧一德重建。其文殊菩薩木像。僧行基所製。初稱文殊寺。天正中改今名。元祿十一年。幕府寄祀田百石。慶應中。陞為勅願所。寶庫藏古文書。試觀其一冊子。集元天間羣雄

筆蹟。亦不易多獲者矣。南去三里。涉七水。其較大者曰羽黑河。發自栗子山。北注入松河。而松河發自吾妻嶽。北注入西邨山郡界。即最上川之上流也。過河則米澤。舊米澤藩主上杉齊憲郊迎。初齊憲始祖輝虎。領加能越數州。及景勝繼業。自會津徙於此。據永井氏遺壘。更加修築。深壕重郭。東曰都命門。曰陽明門。西曰陸幽門。曰單門。南曰待懸門。曰唐栗門。北曰鎮守門。曰勢生門。士庶繞郭而居七千餘戶。今撤城壘為公園。建祠祀輝虎及治



憲稱上杉神社。治憲號鷹山。齊憲曾祖爲人聰明好學。以治績著。嘗諭衆士。文武餘力從事農桑。今時移勢變。列藩士大夫失業流離。獨此地士族田宅仍舊。自食其力。仁人遺澤可謂遠矣。未刻。

車駕臨興讓學校。次

臨福島裁判所支廳。次

臨製絲場。廣六千坪。建廠九百五十坪。甌竈百座。設寬引溪流長七十間。運縑車以水力。其執業者。男三十三人。女百六十人。而資本四萬五千金。其一萬五千。齊憲所給。他募集於士族。據去歲簿冊。

除去經費。收羸利六千三百四十五圓。晡時回蹕。以郡署充行宮。召僧諦忍。賜羽二重絹一

段。齊憲獻名刀二口。因陳傳家寶器以供。

御覽。甲冑六具。兜鍪六領。烏帽三枚。軍麾五柄。鞍鐙一具。紅氈覆鞍一枚。戰袍十三領。馬標二本。劍三口。短刀二口。太刀四十餘口。偃月刀五本。槍五本。旗五。幕二。其爪寶御劍。後奈良帝所賜。吉

光短刀。正親町帝所賜。冠冕緋衣魚袋一具。

冊文一通。明萬歷帝所遺。他泥金屏風。空海墨帖。



琵琶曰朝嵐。茶鐺曰混沌。皆希世名品。無一無來歷。抑不特此也。其所藏宋版漢書。紙堅字鮮。今閱四庫全書總目。宋代古本。彼邦既亡。獨有震澤王氏本。亦覆刻多訛。而我尾州真福寺。江州石山寺。僅存零簡。則此有一而無二之完本。余未寓目。姑記所聞。以告好古者。夜訪片山吾道。吾道長。余數歲。嘗在江戶。同學於謹堂劉博士之門。相遇談舊。亦客中一快事也。

三日陰。早起束裝。呼僮從。熟寐不應。且就縣吏問前途事。曰。此距福島縣十餘里。隔以山嶽。故道二。曰板谷越。曰鷹落越。並險且迂矣。及通庸蒞任本縣。首欲闢新路。便行旅。遣屬吏高木秀明。往察地形。還報曰。從刈安原。南攀峻坂。孤峯凌空。為栗子山。山外卽福島縣界。鑿竇道於山腹。尤為直捷。但一山皆石。難於施工。非假以歲月。不能成功。通庸首肯。先是福島縣屢發吏檢地。謀開路。乃協議。就大久保內務卿具狀稟請。得允許。於是興徒就役。衆懼徒勞無成。異論紛起。尋有肥薩之亂。輒欲停工。



通庸確乎不動。曰工夫失業。或為亂人所煽搖。因購鑿石器於海外。督治益勦。而福島縣亦起徒眾。伐木填谷。破巖石以硝藥。或有遭爆裂死傷者。猶不廢役。五閱寒燠。彼此各至竣功。蓋寶道之屬本縣者二。曰刈安。長三十五間。曰栗子。四百八十二間。屬福島縣者三。曰二小屋。百九十二間。曰大桁。十六間。曰高平。七十七間。以栗子工事最大。概稱栗子新道。語未畢。忽聞擊柝報啓。蹕。馳車出郭門。左折渡二橋。即松河及羽黑河之上流也。橋

東觀音原。綠草如氈。傍設

帷宮。又涉一水。曰

關河。路右曠原。呼為古戰場。延寶中。土人掘得石櫃。中藏髑髏及太刀。矢鏃陶器等。皆千年外物云。登太平坂。巉巖塞路。中穿巨孔。優通車馬。所謂刈安寶道是也。出寶草舍。連軒二三十戶。其東有瓦屋粉壁。擬洋製者。匾曰新道開鑿事務署。新故二道之所歧。舍故取新。抵瀧澤。溪流分派。架二石梁。前者長九十尺。後者三十尺。移御榻於水亭。臨憩良久。從是峻坂盤空。螺旋蛇蟠。與山屈曲。疊



石樹柵巧防壞崩。上御板輿。昇夫簇擁。衛騎抱馬首。後車百餘乘。各以丁壯數人推挽。其徒行者頂足相觸。魚貫而進。漸入雲際。恍有羽化登仙之想。達絕頂則栗子竇口。設小次焉。是日通庸等迎。蹕行開道儀。因賜若干金。時天霽雲開。俯瞰原路。遠邨近落。縮集眼下。彩旗翻風。烟火映空。衆呼萬歲。聲震山谷。既而上却板輿。步入竇道。左右點燈。猶尚昏黑。咫尺不辨。一行數百人。唯聞蹕音而已。行可八九町。豁然別開一天。福島

縣令山吉盛典拜迎路左。下杭甲坂。層嶂刺天。密樹遮日。澗幽谷邃。石徑礚礚。過所謂二小屋竇道。頓於土木廠。資金縣吏。余先蹕徒行渡八圪。峭壁萬仞。路傍樹柵。俯臨深溪。唯聞水聲。不見水流。溪轉則路窮。路窮則圪橫。每過一圪。山之與水。左右易地。而雲烟樹石。頓改面目。大瀧驛茅茨數戶。驛東見大鰲張口。走入口中。穿腹出背。此為大桁竇道。洵奇矣。而有更奇焉者。高平竇道是也。高平距此咫尺。巨巖隔而激流阻。拆開洞門。內架長



橋乘虹驂霓。蜿蜒沿流。委身一竅。入夜國。前者唱  
于。後者唱。喁聲不發揚。若甕中語者。出竇回顧。矮  
松株株抽自石縫。無根無土。不知何人植之。何物  
養之。抑亦可謂奇也。經圓部。降堰坂。左有古祠。曰  
東屋國神社。踰籠坂。右有古祠。曰白和瀨神社。皆  
祀日本武尊。見延喜神名帳。聞距此十餘町。有阿  
部薩摩墓。薩摩者米澤藩士。致仕居此。躬耨耒耜。  
舉闢荒蕪。慶安三年歿。今李平大谷泉南澤諸邨。  
其所開拓。土人至今稱其功云。渡松川圮橋。長四

百二十尺。兩涯田疇。穉稂如雲。蓋粟子以東。地破  
天荒。異觀百出。不可名狀。姑以畫法言之。初也峻  
拔。次而幽邃。又次而奇峭。又次而開朗。至此宛然  
一幅平遠山水圖矣。晚達福島縣治。縣令盛典獻  
新道影寫圖十六紙。桑折驛無能寺住僧良慶獻  
其庭樹所謂御蔭松者影寫圖六紙。是夕一品淑  
子內親王訃音至自西京。

四日朝啟。蹕就歸途。留二品親王代臨福島裁  
判所。大木參議太田侍從及余從焉。所長判事鶴



峯申敬上事務一覽表事畢。追及車駕於松

川驛。經清川二本松二驛。晚次本宮驛。沿道山川

往日所見。如久闊遇故舊。衆喜可知。是日左大臣

奉勅赴會津。巡覽猪苗代湖疏鑿工事。從本

驛北去。隨者大隈參議金井內閣大書記官田邊

內務權大書記官奈良原農商務權大書記官北

條侍從五島四等驛遞官原田陸軍大尉等。凡七

十人。

五日。離驛。沿逢隈川。宿霧漸霽。踰六坂。涉四水。抵郡

山驛。右折一里弱。幸桑野邨。四望渺漠。安達

岩代岩瀨白河。數郡山嶽。遙連雲際。邨內墾田六

百餘町。居民可二百戶。有神祠焉。有學校焉。有牧

畜場焉。大厦倚丘。構造倣洋式。是爲郡署。尚食其

樓上。此地舊稱大槻原。荆棘叢生。狐兔之所遊。先

是本縣欲墾闢以資士族無產者。其來耕者。一戶

貸金二百二十六圓。以充費用。亦不見效功。於是

大參事中條政恒勸誘土人。郡山驛富民阿部茂

兵衛鴨原彌作等二十五人。捐貲興業。遍募同志。



號開成社。茂兵衛為社長。津野喜七副之。開道路。鑿沼池。通溝渠。架橋梁。移佃戶。居數歲。漸成聚落。官乃賞賚。命曰桑野邨。他方士族聞風來集。仍例給貲。以舉闢大藏壇原。對面原。廣谷原。青田原等地。各自團結。冒稱其鄉貫。曰高知開墾社。曰久留米開墾社。曰岡山開墾社。曰鳥取開墾社。曰二本松開墾社。曰棚倉開墾社。社員多者八九十戶。少亦不下二三十戶。是日召各社長若幹事者十二人於郡署。賜金以獎勵焉。已而又幸大藏壇

原。桑圃稻田。茅舍夾路。所謂久留米開墾社是也。趨於真宗僧說教所。土人獻蔬菜數種。蓋快炙背而美芹子。亦足以見其樸忠矣。日晡。回蹕郡山驛。退投旅館。則乞書者隨至。屢滿戶外。皆謝去。夜浴畢。步月中庭。樹影婆娑。微風洗熱。殊覺爽快。六日。夙發郡山。四里餘抵笠石驛。二品親王及大木參議杉宮內大輔等巡視六軒原墾田。賜金勝野源八大中輝光板倉重信。及農夫十五人。先是縣吏白宮內省。以茲土宜栽禾蔬。乃付金十萬圓。放



債收息以充費用。命源八等從事墾闢。源八手執鋤犁。夙夜督役。今未周歲。頗見其效。五里達白河驛。隨二品親王大木參議臨視製絲場。場在驛北。故城址。富民岩淵。專七所創建。專七性慈善。有才幹。嘗病。土人貧困。欲蠶繅興利。餘澤及衆。與親族數輩集貲開業。曰蠶絲勸興會社。旣而驛中火。其家亦燬。毫不屈撓。益致力焉。設氣車水車。抵十五馬力。雇使工女七十人。豫算今歲所製絲。大畧千六七百斤。其直不下一萬八九千金云。是日訪南

朝忠臣結城宗廣遺壘。從驛東沿逢隈川。右折取路田間。喬木森立。絕壁數十仞。曰搦山。卽是矣。文化中有內山重濃者。家於壘下。磨崖爲碑。白河藩儒廣瀨典撰文。賀孝啓書之。字大四寸弱。藩主源定信題額。感忠銘三字。大一尺六寸強。並楷法。道勁可喜。其銘曰。峭乎此山。維石巉巖。溪風肅然。劍佩夜還。踪蹟不刊。輝映千年。民莫自棄。國能生賢。按史。結城氏系出自鎮守府將軍藤原秀鄉。九世孫朝光仕鎌倉。以功封結城。因氏焉。後世分派。一



為下總結城。一為白河結城。白河又分為小峰氏。族大兵強。獮為故家。然時際戰國。朝晉暮楚。向背隨勢。獨宗廣父子。終始勤王。不以死生存亡易節。可尚矣哉。晚回轅遊南湖。地舊沮洳。文政中。定信告老就國。愛其幽邃。鑿開畜水。闊十餘頃。以灌溉田畝。水濱聚土成丘。植櫻柳松檉。築亭其間。花晨月夕。逍遙自適。因分所見。為十六勝。名公宿儒。寄題詩歌。今風景依然。其碑尚存。使人低徊不能去。夜訪大木參議。偕談定信治績。

七日。啟行二里。抵白坂驛。驛左旗宿邨。古者官道所由。有白河關遺趾。曰關山。寬政中源定信建碑標之。曰關址堙沒久。不知其處所。旗宿邨西有叢祠。地隆然而高。所謂白河遶其下。考之圖史詠歌。又徵地形。此為遺址。較然無疑。廣瀨典又著白河古事考。證以古書。鑿鑿可據。但其考設關年代。未免踈謬。其言曰。孝德帝設逢坂鈴鹿不破三關。是為本邦置關權輿。舊事紀載。景行帝幸常陸。至白河關事。蓋後人偽撰不足取。三代實錄貞



觀八年正月條。有鹿島宮司奉幣諸社。陸奥國稱無舊例。不聽入關之文。所謂關者。卽白河關也。然彼唯曰關。何以的知其爲白河關乎。余嘗閱享祿本三代格。承和二年太政官符曰。應准長門國關。勘過白河。菊多兩剋事。右得陸奥國解。傳檢舊記。置剋以來。于今四百餘歲矣。承和先貞觀數十歲。更溯至四百餘歲。雖不及。

景行帝時。遠在孝德帝以前。典以博洽稱。當時享祿本未傳於世。所以致謬也。又行九里。經堀越鍋掛大田原三驛。

次作山驛。所見山河。皆昔者那須氏封境。而余家系出自那須氏。建久中有六郎兵衛尉資成者。領本州都賀郡川田邨。因氏焉。六世孫資長。西徙仕吉川氏及毛利氏。今追思祖業。不覺慨然泣下。是日藤本周三從白河迂路踰關山。抵本郡湯津上邨。觀那須國造碑。還示榻本。此與多賀碑多胡碑稱三古碑。昔者埋沒草間。世未之知。元祿中水戶侯光圀往訪。封土築壇。覆以屋宇。碑高四尺四寸。文八行。每行十九言。合一百五十二言。筆法古樸。



文義晦澀。加以漫漶毀損。先哲源君美佐佐宗淳以下。解釋有異同。近者黑羽人三田稱平。折衷衆說。著那須國造碑考。以寄贈焉。以余淺陋。能得讀之者。蓋稱平之貺也。

八日。朝雨歇。發作山。經喜連川氏家。白澤三驛。未刻次。宇都宮驛。縣信緝來訪話。舊信緝字元吉。號六石。舊宇都宮藩士。少與余同學。江戶講經崇尚洛閩。旁工書畫。善劍法。中興初徵為權辦事。遷司法判事。近日致仕養痾。舊里。先是信緝勸藩主

戶田忠恕及公族大夫戶田忠至。上書幕府。修列朝山陵。時余舊君松山侯為閣老。乃慫恿採用其言。以忠至為山陵奉行。及功成。先帝賜舊君以御衣一領。陞忠至秩為列侯。食邑一萬石。而原其所由。蒲生君平實為之首倡。君平名秀實。寬政享保間人。好學尚氣節。居常憂王風式微。政在武臣。西游京師。主歌人小澤蘆庵氏。搜訪古帝陵。著山陵志。職官志。諸書。以寓意焉。世與林子平高山仲繩並稱為三偉人。今上親政。廢幕府。追褒



其忠。賜遺族以三口糧。建碑旌表門閭。丙子東巡。賜祭粢料若干金。今夏又贈正四位。其碑在本驛南新町。題勅旌忠節蒲生君里九字。

九日。衝雨早發。深泥沒輪。二里抵雀宮驛。右有古塚。往年土人掘獲古鏡二。古鈴一。金玦銀玦等。賞鑑家以爲大化以前物。納之東京博物館。余嘗見其鏡。背彫富貴安樂云云字。形似宣和博古圖所載漢鏡。洵奇寶也。經石橋驛。從小金井驛。迂路三十町。訪藥師寺遺跡。史稱天平勝寶六年。設戒壇於

南都東大寺。天平寶字五年。設戒壇於下野藥師寺。筑紫觀世音寺。凡僧尼受戒者。上國於東大寺。鎮西於觀世音寺。而坂東於藥師寺。所謂藥師寺。後罹兵燹。其地稱大山鄉。有兩刹焉。曰龍興寺。有唐僧鑑真。及弓削道鏡墳。曰安國寺。安置藥師如來像。又有六角堂。享保中。兩刹僧徒各以己寺爲戒壇遺蹟。訴之幕府。不決。然安國寺側毀瓦堆積。土人拾得其款文。曰藥師寺瓦者。楷法道美。非後人所能模造。則馮爲左券。彼曲此直。片言可斷。復



陸奥紀程 卷五  
何容疑於其間乎哉。雨甚。復由原路還。過羽川驛。追及。車駕於小山驛宿焉。是夕左大臣至。自猪苗代湖。具奏疏水始末。湖在岩代州會津耶麻安積三郡交界處。周圍十三里十九町。面積七方里。底深四百尺。萬山環立。衆溪歸焉。而其水獨從西涯戶口注出。曰日橋川。北流與大川只見川合爲阿賀川。入新瀉海。初安積郡民相樂半右。山岡友次。山岡山三等。憂本郡田野不得水利。謀遠引湖水以供灌溉。連署建言。不報。及福島縣吏中條

政恒來督開成山墾闢事。復陳前言。政恒爲白之。大久保內務卿。卿納其言。遣吏檢察地形。旣而官募起業公債六百萬金於海內。欲分其六十五萬餘圓充墾田疏水工費。使內務御用掛奈良原繁擔任其業。會卿薨。伊藤參議兼內務卿。仍繼遺志。已卯冬與松方勸農局長偕行。起工儀於開成山。其墾闢委之本縣。而疏水工事委勸農局。命南一郎平。新渡戶七郎。羽根田延光。稻田秀實。後藤良介。伊藤鉞五郎。澀谷喜三。磯長得三。大橋靖。邨岡



彰等各司其職。繁以內務權大書記官為之總督。因按地經畫。蓋水道所經約二十餘里。支流分派。又若干里。平地開溝若干。鑿山為暗溝若干。築堤若干。設閘伏寬架橋梁又若干。費額約四十萬圓。分功程為二期。第一期起戶口至第七番暗溝。第二期自第七番暗溝至牛庭原。於是興工始自戶口及布藤兩堰。浚鑿其底。深二尺。寬方百間。上架石梁。長二百尺。穿雙孔。形類鸞隸鏡。下列十六間。開闔瀆池以備旱澇。湖東曰山瀉灣。左右築石埭。

中鑿溝渠。東去三百間。為水門橋。又東千八十七間。為田子沼。又東六百五十三間。為沼上嶺。鑿竇三百二十五間。竇口設閘門。鐵鎖約門扇。啓閉用轆轤。是為番外暗溝。溝水瀉下為瀑布。百四十五尺。東流三千九百八十一間。入玉川堰。列九閘。閘外開溝千二百十一間。至高玉邨。疏水橋。橋跨五百川。長二十餘尺。亦石造穿雙孔。水從孔中南走。經第一番暗溝。逐次達第七番暗溝。起工以來。再閱寒暑。有司奔走。夙夜匪懈。日役工夫七八百人。



里民四集。不待令而來助役者又若干人。稱寸志夫。今茲七月所謂第一期工事告竣。松方內務卿前勸農局長奈良原權大書記官等。行通水儀於開成山。而第二期工事亦將待明歲竣功。果然則灌溉所及新舊水田五千餘町。收穫歲增數萬石云。十日。昨雨始收。泥路未乾。經真間田野木二驛。抵古河驛。東有源三位祠焉。據平家物語。宇治河之役。三位自殺。渡邊唱沉其首於河底。而源平盛衰記曰。下河邊清恒匿首於平等院牀下。傳聞雖異。其

不委首於敵手則同。永享記所載。清恒佯為修驗者。東歸。座首於古河城東南龍崎者。不為無謂。乃尊卑分脈則曰。濃州山縣郡有三位墓。未知何據。與橿木縣大書記官片山重範偕訪熊澤伯繼墓於鮭延寺。鮭延越前者。最上氏饒將。元和中。最上氏禱封。越前漂泊無所依。部下二十人協力相助。既而古河城主土井利勝授越前以祿五千石。越前不自取。分予二十人。各二百五十石。而每日輪番寄食其家。及歿。二十人者為建此寺云。伯繼夫



妻墓在於寺側。歲久傾壞。重範白之。舊岡山侯。修理。繚以石欄。初伯繼事岡山侯光政。大著治績。晚致仕。客居茲土。大將軍常憲公聞其賢。欲召見。會伯繼論時弊二十餘條。為封事。未上。為人所竊。寫。獲譴幕府。禁錮終身。吁伯繼大才。世稱王佐。而非其時。所施止一國。惜夫。中田驛北。光了寺。藏源。廷尉妾靜女。舞衣一領。及護身刀一口。馬鐙一雙。雖不審真否。亦皆數百年外物矣。渡利根川。浮梁。過栗橋驛。次幸手驛。與杉大輔。金井大書記。官湯。

淺侍醫。應里人。秋間某招。同遊其園。密樹清泉。隔籬望平野。幽致可愛。是日二品東伏見親王。及白根埜玉縣令。足立宮內書記官等來迎。

十一日。快晴。晨發幸手。四望稻田。往日碧浪。今為黃雲矣。經杉戶粕壁。越谷草加。四驛。抵千住驛。

皇后及皇族大臣以下百官郊迎。乃相率入京。海陸軍兵整列夾路。士女雲集。呼萬歲。未刻達赤坂皇居。扈從臣工。順次謁見。賜酒饌於便殿。退歸私第。此行往還閱七十四日。陸路四百八十二里。三



十町。海程三百十二里。而舟車安穩。公餘弄筆記  
所見。亦 聖朝右文之澤矣哉。

隨鑿紀程卷五



